

Pep-hini a a anavez an troioù-kamm c'hoariet gant Alanig al Louarn diwar-goust an anevaled-all. Ret eo gouzout e zegouezh an darn vrasañ anezho er Menez Arre tro-dro Brasparzh. Ouzhpennet 'm eus ur pennad 11 diouzh ma fluenn d'an hini diwezhañ gant **Jakez Riou**.

Dibenn pennad 10 gant Jakez Riou :

...Alanig a lavaras d'e wreg :

« Gwelout a rit, Chann ? Gounezet em eus. Anvet on da sekretour ha kuzulier ar roue, hag ouzhpenn, na vravañ tra ! ministr ar justis ! »

«N'eo ket posubl!»

«Eo, eo, ministr ar justis on anvet. Bremañ an hini a zisplijo din n'en devo ket pell da vevañ ken, ma karan. E vuhez a zo etre va daouarn».

D'ar mare-se e oa kreñv al liammoù etre ar roue hag an Iliz kristen. Hennezh e oa kannad an Aotrou Doue war an Douar. Ha pa oa bet anvet Alanig da vinistr ar Justis gant ar Roue e oa ret dezhañ touiñ war an aviel en Iliz Veur Sant Kaourantin Kemper.

Ne oa ket Alanig un den difeiz, pell ac'hane zoken. Doujet strizh gantañ un nebeudig kreañsoù ar relijion. Da skouer e krede mort er galloud ar c'hofez evit diverkañ ar pec'hedoù. Goude pep torfed e veze gwelet ar penedour er gador-gofez en Iliz Itron Varia Brasparzh. (Daoust ma oa lec'hiet kastell-al-Laer e-kichen Sant Riwall hag e oa bet savet eno un iliz-trev ne felle ket d'ar parrezian lorc'hus daremprediñ un ilizig. Ouzhpenn-se ne oa ket evit gouzañv c'hwezh fall ar bilhaouerien flaerius a veve eno. Ne oa ket evitañ bezañ kemmesket ganto.)

Ar person-kanton- ul liper touet lart ha mignon d'e vanne- a roe an absolvenn dezhañ hep marc'hata. Gwir eo, alies e veze pedet ar paotr-e-gof da goaniañ er c'hastell. Plijout a rae dezhañ meuzioù fardet gant Chann saourusoc'h eget re aozet gant e garabasenn gozh. Servijet dezhañ kaboned pe houidi desavet en un doare ekolojik war borzh ar c'hastell, kig oan prenet a briz uhel digant ur c'houer mignon d'ar familh. Ne oa ket an den a relijion figus na war ar boued na war an evaj. Ha krediñ a rae e oa gwir bater komzoù e ostiz diwar-benn orin ar c'hig. Laeret pe get, peseurt diforc'h ? N'halle ket an Aotrou Person nac'h e bardon ouzh ur fidel ken brokus, anat eo.

Ne oa ket evit Alanig faziañ war ar gador-gofez e-barzh an iliz. A-dreñv rideoz an hini all e oa hanter-guzhet ur beleg a orin eus Bro-Leon. Diwar ar gador-brezeg e rae al Leonad hir ha treut sarmonioù entanet a varne al lonkerien da vezañ kaset d'an ifern hag an dorfedourien da vezañ jahinet keit ha ma pado ar bed. Hopala ! Komzoù ken rok ne oant ket evit diboaniañ ur pec'her war hent an daspren. Ne felle ket d'ar parrezian bezañ kaset d'ar marv er stad a bec'hed marvel gant tennoù fuzuilh ur c'houer bennak e-kerzh e laeradennoù noz. Eta e rae pinijenn o tibunañ pedennoù roet dezhañ gant e c'hofesour muiañ-karet. Goude bezañ paterat en un doare virvidik - war a seblante d'ar re tro-dro dezhañ- e kemere ar pec'her dinammet e galon penn an hent etrezek Kastell-al-Laer. Koulskoude bec'h d'ar yerigoù war hent an distro!

Evit doare e oa ur parrezian direbech deuz outañ. E-kerzh an oferenn-bred en iliz Brasparzh e dreveze ardoù un devod gant e bikol levr oferenn en e zorn. Ha Chann en he gloria mundi gant ur groaz eus ar c'haerañ en he c'herc'hen a gane kantikoù a-bouez he fenn en ur ziwall he bugale sentus renket hervez o ment. Ur familh kristen penn-kil-ha-troad. Pa dremene e-bioù ar masikod o kestral e veze lakaet pezhioù- gwir pe faos -lufus ha trouzus er gluzenn. Ha pep-hini da vamañ dirak brokusted Alanig.

Pa zeue ar gesterien evit dastum diner an Iliz e veze roet dezho mel a loaioù ha nebeut a wenneien. Pa oa eñ a-wel d'e genseurted e stoue e benn dirak ar c'hroazioù hag e wiske ur mell sin ar groaz en e gerc'hen.

E-touesk e berzhioù mat e veze anavezet e garantez evit e vugale. Fellout a rae d'an tad treuzkas e skiant-prenet dezho. Danvez a oa. Da skouer e oa bet desket dezho an doare da higennañ karpedoù dre-laer el lenn abati-ar-Releg tost d'o demeurañs. Ha desket mat gant ur mailh war ar vicher e oant bet. Ne oa ket anv da soubañ al lost en dour en ur c'hortoz e vefe ur pesk bennak e kroug ouzh penn al lost. Ur mare zo bet e oa bet aliet Job gant e gomper Alanig d'ober-se da vare ur goañv kalet. Da heul an abadenn e oa chomet hanter-vesk ar paourkaezh Job.

A-drugarez d'al laeroñsi el lenn ar venec'h e veze debret boued vijil bep Gwener hag e-doug ar c'horaiz e ti Alanig. Pebezh buhez skouerius evit tud an tolead!

Bep bloaz da zeiz Gouel-Maria-Hanter-Eost e weled Alanig hag e diegezh war hent pardon Brasparzh. Amañ e zouge ar pardoner banniel Sant Tujen, sonn e benn ha lorc'h en e doull. Da ouel Mikael e veze dalc'het ur brosesion vras etre Brasparzh ha Chapel Sant Mikael. E kompagnunezh loened all eus ar vro deñved, gedon, konikled diouzh an druilh, skouled glaz, skouled-hañv, bour-lagaded hag erminiged e kane an dibunadeg :«Euz ho tron savet uhel, war lein Menez Are...». Koulskoude hiniennoù zo a veze war evezh rak Alanig a oa war yun ha bale a rae e selloù war kig fresk ar birc'hirined. A daol-trumm tavet krenn kriadennoù safarus ur vandenn gwazi kuilh ha disoursi- o doare da bediñ en ur drailhañ spontus pozioù ar kantikoù- . Pebezh cholori! Par d'an hini o hendadoù e Rom pa oa bet argadet ar C'hapitol gant ar C'halianed. Koulskoude ne felle ket d'ar merc'hed da Junon bezañ dibluet ha debret kig hag eskern. Ne oa ket erruet amzer Nedeleg c'hoazh. Gwelloc'h e oa kerzhout hep bezañ remerket gant ar paotr c'hoantus.

E-sell e oa an danvez ministr ar justis da bardonañ e Landreger- embannet en doa ar brud-se tro-dro dezhañ daoust ma ne oa ket e anvidigezh asantet gant an eskob c'hoazh. Ken brav e vefe gwelet Alanig e penn an dibunadeg o kuitaat an Iliz-Veur dre an nor-dal hag an dud a lezenn d'e heul dindan lagad Sant Erwan. Pebezh enor evit ur paotr hep feiz na reizh! Koulskoude, darbet e oa d'an traoù treiñ war an tu a-enep. War e dremen e oa bodet e enebourien touet : Lom, Job, Lostigloan en o zouez o krial :

- N'eo ket ur vezh gwelet seurt lampon e penn ar jeu!
- N'eo ket amañ e blas, e-barzh an toull-bac'h al laer!
- Un torfedour, n'eo nemet un torfedour!
- Kerzh kuit etrezek da doull lous !
- Sellit ouzh ar brabañser o rodal e revr!
- Boued ar groug a zo ac'hanout!

Ha gerioù gros da-heul...

Dre eurvad e oa Flaer ar broc'h ha mignoned d'e ouenn o heuliañ an ambrougaded. Lakaat a reont ar re-drouzus da serriñ o beg. Ha Lanig da gendelc'her gant e hent. Chom a rae d'an eskob kadarnaat anvidigezh ur fidel ken devot. Mall a oa war Alanig lakaat e zorn dehoù war al levr sakr en ur lavaret :«Touiñ a ran fealded da lezenn Mab-den ha lezenn Doue.»

A-ziwar vremañ e oa Alanig mestr war vuhez tud eus ar vro, dreist-holl war vuhez e enebourien.